



Ein cyf/Our

Huw Irranca-Davies AS
Cadeirydd
Y Pwyllgor Deddfwriaeth, Cyfiawnder a'r Cyfansoddiad

07 Ionawr 2022

Annwyl Huw,

Gydag ymddiheuriadau diffuant, cafodd y llythyr hwn ei ysgrifennu'n wreiddiol ar 2 Rhagfyr 2021 ond oherwydd amrufusedd, ni chafodd ei anfon. Ar adeg drafftio'r llythyr hwn, roedd yn ateb y ddau argymhelliad yn adroddiad y Pwyllgor ar y memorandwm cydsyniad deddfwriaethol atodol (Rhif 2) ar Fil yr Heddlu, Troseddu, Dedfrydu a Llysoedd a gyhoeddwyd ar 25 Tachwedd.

Gan fod y llythyr hwn bellach wedi dyddio, rwy'n ei anfon fel mater o ffurfioldeb.

Ar 7 Ionawr 2022, anfonais lythyr arall atoch, ynghyd â memorandwm cydsyniad deddfwriaethol atodol Rhif 4, sy'n nodi'r sefyllfa ddiweddaraf mewn perthynas â'r Bil.

Rwy'n ysgrifennu mewn cysylltiad â'r adroddiad a gyhoeddwyd gan y Pwyllgor Deddfwriaeth, Cyfiawnder a'r Cyfansoddiad ar 25 Tachwedd ynghylch y Memorandwm Cydsyniad Deddfwriaethol Atodol ar Fil yr Heddlu, Troseddu, Dedfrydu a'r Llysoedd a osodwyd ar 5 Tachwedd.

Rwy'n nodi eich dau argymhelliad ac rwyf wedi eu hateb fel yr amlinellir isod.

Argymhelliad 1. Dylai'r Gweinidog, cyn y ddadl ar y cynnig cydsyniad perthnasol, gadarnhau pam nad oedd Memorandwm Rhif 2 ar y Bil yn cyfeirio at gymalau 7 ac 8, ac esbonio hefyd sut mae cymal 17 yn ymwneud â chymalau "9 i 22" fel y nodir ym Memorandwm Rhif 2.

Ateb:

Digwyddodd gwall wrth ddrafftio'r Memorandwm Cydsyniad Deddfwriaethol Atodol. Dylai fod wedi nodi, o ystyried y gwelliant y cytunwyd arno i gymal 17, ein bod o'r farn bod cymalau 7 i 22 o'r Bil fel y'i diwygiwyd yn gofyn am gydsyniad deddfwriaethol y Senedd, a dylid bod

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Jane.Hutt@llyw.cymru
Correspondence.Jane.Hutt@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

wedi cyfeirio at y cymalau hynny fel rhai yr wyf yn argymhell bod y Senedd yn rhoi ei chydysyniad iddynt.

Roedd y Memorandwm Cydsyniad Deddfwriaethol a osodwyd ar 28 Mai yn argymhell y dylid atal cydsyniad deddfwriaethol y Senedd i gymalau 9, 17 a 18 gan nad oedd oeddent yn ystyried natur ddatganoledig y cymalau hynny'n ddigonol, hynny yw caniatáu i'r Ysgrifennydd Gwladol osod swyddogaeth ar Awdurdodau Cymreig Datganoledig. Roedd yr un Memorandwm yn argymhell y dylid rhoi cydsyniad deddfwriaethol y Senedd i gymalau 7, 8, 10-16 a 19-22 gan nad yw'r cymalau hyn yn gosod swyddogaethau ar Awdurdodau Cymreig Datganoledig.

Mae'r gwelliant a osodwyd yng Nghyfnod Pwyllgor Tŷ'r Arglwydd sy'n ymwneud â chymal 17 yn ei gwneud yn ofynnol i'r Ysgrifennydd Gwladol gael cydsyniad Gweinidogion Cymru cyn defnyddio'r pŵer i gyfarwyddo Awdurdodau Cymreig Datganoledig. O ystyried y gwelliant, rydym bellach yn fodlon bod y pecyn o fesurau a gynhwysir yng nghymalau 7-22 yn darparu amddiffyniad a mesurau diogelu priodol o ran y rhyngweithio ag Awdurdodau Cymreig Datganoledig a materion datganoledig eraill ac rwyf bellach yn argymhell y dylid rhoi cydsyniad y Senedd i gymalau 7-22 o'r Bil.

Rydym yn rhagweld y bydd newidiadau pellach i'r Bil, gan gynnwys diwygiadau pellach i'r cymalau ynghylch y ddyletswydd trais difrifol, yn ogystal â chyflwyno darpariaethau cwbl newydd. Deallwn y gall gwelliannau barhau i gael eu cyflwyno mor hwyr â 4 Ionawr. Bydd swyddogion yn parhau i sicrhau bod y Pwyllgor a'r Senedd yn cael gwybodaeth am ddarpariaethau'r Bil hwn, sy'n newid yn barhaus, yn unol â gofynion Rheol Sefydlog 29 fel bod ganddynt y darlun llawnaf ar adeg y ddadl mewn perthynas â'r darpariaethau hynny yr ystyrir eu bod o fewn cymhwysedd deddfwriaethol y Senedd.

Argymhelliad 2. Dylai'r Gweinidog, cyn y ddadl ar y cynnig cydsyniad perthnasol, gadarnhau safbwynt Llywodraeth Cymru ynghylch pa gymalau yn y Bil y mae angen cydsyniad y Senedd iddynt, a hefyd:

- *y cymalau y mae'n argymhell rhoi cydsyniad iddynt;*
- *y cymalau nad yw'n argymhell rhoi cydsyniad iddynt;*

Ateb:

Rydym yn gwneud yr argymhellion canlynol ynghylch cymalau'r Bil fel y'i diwygiwyd yn dilyn Cyfnod Pwyllgor Tŷ'r Arglwyddi:

Mae Llywodraeth Cymru yn argymhell cydsynio i'r cymalau canlynol:

Rhan 1 – Cymal 1 Cyfamod yr Heddlu

Rhan 1 – Cymal 2 Cynyddu'r gosb am ymosod ar weithwyr brys

Rhan 2 – Cymalau 7-22 Dyletswydd Trais Difrifol

Rhan 2 – Cymalau 23-35 Adolygiad o Laddiadau ag Arfau Tramgwyddus

Rhan 2 – Cymalau 36-37, a 41-43 Echdynnu Gwybodaeth o Ddyfeisiau Electronig

Rhan 3 – Cymal 61 Achos niwsans cyhoeddus yn fwriadol neu'n ddi-hid

Mae Llywodraeth Cymru yn argymhell atal cydsyniad i'r cymalau canlynol:

Rhan 2 – Cymal 47 Difrod Troseddol i Gofebau: dull treial

Rhan 3 – Cymalau 56, 57 a 60 Trefn Gyhoeddus

Rhan 4 – Cymal 63 Gwersylloedd diawdurdod (Trosedd sy'n ymwneud â byw ar dir heb ganiatâd mewn cerbyd neu gyda cherbyd)

Fel y nodwyd uchod, mae'r Bil hwn yn newid yn barhaus, ac o ystyried y dyddiad cyflwyno olaf tebygol, sef 4 Ionawr, bydd y darlun llawn o ran y Bil yn parhau'n ansicr tan yn agos iawn at y ddadl yn y Senedd. O'r herwydd, gallai argymhellion Llywodraeth Cymru ynghylch cydsyniad barhau'n ansicr tan hynny.

A handwritten signature in black ink that reads "Jane Hutt". The signature is written in a cursive style with a long horizontal line above the first letter 'J'.

Jane Hutt AS/MS

Y Gweinidog Cyfiawnder Cymdeithasol
Minister for Social Justice